

四庫全書

史部

欽定四庫全書

史部  
江西通志卷三十

詳校官監察御史<sub>臣</sub>左周

檢討<sub>臣</sub>德生覆勘

總校官知縣<sub>臣</sub>楊懋珩

校對官中書<sub>臣</sub>高 中

謄錄監生<sub>臣</sub>萬朝宗

欽定四庫全書

江西通志卷三十

武事 二

唐

高祖武德四年

戊寅

冬十月蕭銑江州總管蓋彥舉以五

州降

豫章書

唐書蕭銑傳云偽江州將蓋彥舉以城降趙郡王孝

恭李靖直逼其都

五年

己卯

冬十月楚王林士宏卒其衆遂散

通鑑綱目

林士宏傳云士宏弟鄱陽王藥師以兵二萬圍循州

總管王世略破斬之士宏請降王戎

士宏黨

亦獻南昌

地詔戎為南昌州總管士宏復遁保安城山袁人相

聚應之為張善安所察以兵赴討會士宏死黨乃解

太平寰宇記云平林士宏改洪州總管為都督領洪

吉虔饒撫南平六州

六年

庚辰

春三月唐前洪州總管張善安反冬十二月唐

安撫使李大亮討張善安執之

同上

張善安傳云善安掠孫州

武德五年以洪州南昌縣置孫州

執總管

王戎會李大亮兵至為開曉禍福答曰善安初不反  
為部下詿誤降易耳恐不免奈何大亮曰總管定降  
吾固不疑因獨入其陣與善安握手語乃大喜將數  
十騎詣大亮營大亮引入命壯士執之騎皆驚引去  
悉兵來戰大亮諭以善安自歸無庸鬪其黨罵曰總  
管賣我遂潰送善安京師稱不與輔公祐謀赦之公

拓破得其書遂伏誅

太宗貞觀十八年

甲辰

秋七月上將征高麗勅將作大監

閻立德等詣洪饒江三州造船四百艘以載軍糧

豫

章書

二十二年

戊申

秋八月命洪州造海船及雙舫

同上

高宗龍朔二年

壬戌

滕王元嬰為洪州都督

同上

按涂廙豫章記滕王元嬰除洪州在顯慶元年非龍

朔也

中宗嗣聖六年

己丑武后永昌元年

夏四月太后殺鄱陽公譚等

十二人

通鑑綱目

豫章書云譚謀迎中宗於廬陵故誅

按綱目嗣聖二年三月中宗已從廬陵遷房州

明皇開元十五年

丁卯

張九齡為洪州都督

豫章書

肅宗至德二載

丁酉

春二月江南採訪使李成式討永王

璘璘敗走死

通鑑綱目

永王璘傳云璘領山南江西嶺南黔中四道節度使

至德元載分江南  
西道領豫章諸郡

其子襄城王陽剛鷺有勇樂於侶

亂勸璘取金陵即引舟師東下會有旨降璘庶人諸  
將遂割臂反盟渾惟明奔江寧馮季康奔白沙季廣  
琛兵六千亦遁成式遂進射傷中肩軍潰璘與高仙  
琦奔鄱陽司馬陶備閉城璘怒焚城門以入收其庫  
兵掠餘千將走嶺表江西採訪皇甫旆兵追擊之戰  
大庾嶺璘中矢被執旆殺之傷為亂兵所害仙琦逃  
去



乾元元年

戊戌

冬十二月戶部尚書李峘都統淮南江東

江西節度使

豫章書

上元元年

庚子

冬十一月江淮都督劉展反

通鑑綱目

豫章書云冬十一月劉展都統淮南江西浙西節度

使詔舊都統李峘圖展展反峘奔洪州展遣其將傅

子昂屯南陵將下江州徇江西明年正月展伏誅又

辯劉展亂紀云淮南東道浙江西道凡二十二州置

都統節度下稱以展為都統江南淮南節度使下又

稱三道皆發吏申圖籍按舊李峘傳峘都統淮南江

南江西節度使展既代峘其所統亦三道耳淮南者

東道揚楚滁和舒廬濠壽八州也江南者昇潤常蘓

杭湖睦七州也江西者洪虔江吉袁撫信七州也

信州

於乾元元年置凡二十二州亂紀誤以二為三又脫江南西

道字耳

實應元年

壬寅

秋九月台州賊袁晁陷信州

豫章書

綱目云代宗廣德元年李光弼部將張伯儀討平袁

晁

代宗大歷八年

癸丑

秋九月嶺南將哥舒晁殺節度使呂

崇賁詔江西觀察使路嗣恭兼領南節度使討之

唐書

德宗建中三年

壬戌

冬十月以曹王皋為江西節度使

通鑑

綱目

曹王皋傳云至豫章大令將吏曰有功未申與懷器

謀不發者皆自言得裨校伊慎李伯潛劉旻悉補大將擢王諤為中軍以馬彞許孟容為幕府治戰艦裒

兵二萬以士二千五百委慎等教之自將五百人教以秦兵團力法聯其賞罰弛張如一乃約以五百人擊慎卒二千五百莫能當其鋒即盡以教之初慎嘗從李希烈平襄州至是希烈懼為皋用即反間德宗信之將誅慎皋請赦之會與賊夾江陣皋勉慎立功以所乘馬及器鎧賜之使將先鋒斬賊數百級乃免按伊慎所斬之賊即李希烈部將韓霜露之兵豫章書以為江中羣盜者誤

憲宗元和二年

丁亥

冬十月削李錡官爵屬籍徵江西兵

出信州討之

豫章書

按李錡之反豫章書誤入元年今從唐書帝紀改正

宣宗大中十二年

戊寅

夏六月江西軍亂逐觀察使鄭憲

冬十月以韋宙為江西觀察使討亂軍平之

通鑑綱目

豫章書云江西都將毛鶴叛逐觀察使鄭憲詔以光

祿卿韋宙為江西觀察使

宙父丹有惠政於江西

發鄰道兵討

毛鶴宙過襄州徐商遣都將韓季友帥捕盜將從行  
宙至江州季友請自間道陸行比明至洪州即日討  
平之宙奏留捕盜將二百人於江西以季友為都虞  
侯

懿宗咸通六年

乙酉

夏五月置鎮南軍於洪州

豫章書

楊收傳云自大中以來南蠻火邕州掠交趾調人往  
戍死者十七收議募豫章士三萬置鎮南軍以拒蠻  
又峙食汎舟以餉南海

僖宗乾符四年

丁酉

四月江西賊柳彥璋陷江州執其刺

史陶祥高安制置使鍾傳陷撫州十二月江州刺史

劉秉仁及柳彥璋戰敗之

帝紀

豫章書云柳彥璋襲陷江州使陶祥上表彥璋亦自  
附降狀勅以彥璋為右監門將軍令散衆赴京師以  
左武衛將軍劉秉仁為江州刺史彥璋不從以戰艘  
百餘立水寨於湓江剽掠如故秉仁乘驛之官單舟  
入水寨賊出不意即迎拜秉仁斬彥璋散其衆

鍾傳傳云王仙芝猖狂江南大亂衆推傳為長乃鳩  
夷獠依山為壁至萬人自稱高安鎮撫使仙芝遣柳  
彥璋掠撫州不能守傳入據之言諸朝詔即拜刺史

五年

戊戌

春二月王仙芝餘黨陷洪州黃巢陷虔吉饒信

等州

通鑑綱目

唐紀云二月王仙芝伏誅其將王重隱陷饒州刺史  
顏標死之江西賊徐唐莒陷洪州四月饒州將彭令  
璋克饒州自稱刺史徐唐莒伏誅



黃巢傳云宋威斬仙芝傳首尚讓率潰衆歸巢推為  
王號衝天大將軍建元王霸驅河南山南民十餘萬  
掠淮南詔以曾元裕為招討使更拜張自勉北面行  
營招討使時巢兵在江西者為高駢所破詣天平軍  
乞降即叛去轉寇浙東駢遣將張潁梁繼攻破之復  
踰江西破虔吉饒信等州刊山開道七百里直趨劍  
州

六年

己亥

冬十月江西招討使曹全晟與山南東道節度

使劉巨容合兵破黃巢於荊門全晟代還賊勢復振

陷鄂州掠饒信等十五州衆至二十萬

同上

廣明元年

庚子

正月淮南將張潁及黃巢戰於大雲倉敗

之四年潁克饒州五月潁及巢戰於信州死之

帝紀

豫章書云張潁渡江擊賊帥王重霸降之屢破黃巢

軍巢退保饒州別將常宏以其衆數萬降潁攻饒州

克之巢走屯信州遇疾疫卒徒多死潁急擊之巢以

金啗潁且致書請降於高駢求保奏駢欲誘致之許

為求節鉞時昭義感化義武等軍皆至淮南駢恐分  
其功乃奏賊不日當平不煩諸道兵請悉遣歸賊訶  
知諸道兵已北渡淮乃告絕於駢且請戰駢怒令潞  
擊之兵敗潞死巢勢復振

中和二年

壬寅

秋七月以鍾傳為江西觀察使

豫章書云鍾傳逐江西觀察使高茂卿據洪州朝廷  
以傳為江西觀察使從高駢之請也傳既去撫州南  
城人危全諷復據之又遣其弟仔昌據信州

光啟元年乙巳正月南康賊盧光稠陷虔州

帝紀

豫章書云盧光稠陷虔州自稱刺史以其里人譚全播為謀主考異云歐陽修五代史曰盧光稠譚全播皆南康人光稠狀貌雄偉無他材能全播勇敢有識略然全播常竒光稠為人唐末羣盜起全播聚衆立光稠為帥是時王潮攻陷嶺南全播攻潮取其虔韶二州十國紀年曰全播推光稠為之謀主所向克捷光啓初據虔州光稠自稱刺史天復中陷韶州使其

子延昌守之按新紀云光啓元年正月光稠陷虔州  
天復二年陷韶州五代史以為同時取虔韶二州誤  
也今從新紀

綱目云光啓元年正月詔招撫秦宗權責租賦於光  
州王緒不能給宗權發兵擊之緒懼悉舉光壽二州  
兵五千人渡江轉掠江洪虔州陷汀漳前鋒將擒緒  
而奉王潮

昭宗景福元年

子夏

六月劉建鋒馬殷收餘衆走洪州

劉建鋒傳云孫孺之敗建鋒殷收散卒轉寇江西有衆七千推建鋒為主殷為前鋒張佖為謀主掠洪虔數州衆遂十餘萬

乾寧四年丁巳秋八月鍾傳進逼吉州刺史周琲奔襄陽

豫章書

天復元年辛酉冬十二月江西節度使鍾傳取撫州

通鑑綱目

鍾傳傳云傳率兵圍撫州天火其城士民謹驚諸將

請急攻之傳曰乘人之險不可乃祝曰全諷之罪無  
為害民火即止全諷聞之謝罪聽命以女女傳子匡  
時傳以匡時為袁州刺史擊馬殷又以彭玕為吉州  
刺史玕健將也傳倚以為重

昭宣帝天祐

昭宗  
舊號

三年

丙寅

夏四月鎮南節度使鍾傳卒

子匡時為留後秋九月楊渥

行密  
子

取洪州

同上

鍾傳傳云天祐三年傳卒匡時自立為節度觀察留

後次子匡範

實錄作延圭十  
國紀年作延規

為江州刺史怨兄立挈

江州附淮南因言兄結汴人圖揚州渥使秦裴攻匡  
時圍洪州匡時城守不出凡三月城陷淮軍大掠三  
日止執匡時及司馬陳象歸揚州渥切責匡時頓首  
請死渥哀赦之斬象於市彭玕既失援厚結馬殷且  
觀虛實使者還曰殷將校輯睦未可圖也遂歸款  
豫章書云七月秦裴至洪州軍於蓼州諸將請阻水  
立寨裴不從匡時遣其將劉楚據之諸將以咎裴裴  
曰匡時驍將獨楚耳若帥衆守城不可猝拔吾故以



要害誘致之未幾破寨執楚遂圍洪州饒州刺史唐  
寶請降九月裴拔洪州俘匡時等五千人以歸楊渥  
自兼鎮南節度使以裴為洪州制置使

四年

丁卯四月  
梁代唐

春正月黑雲都指揮使呂師周將兵屯

上高遂出奔於湖南夏五月楚王殷遣兵會吉州刺  
史彭玕攻洪州不克冬十二月遣兵攻信州刺史危  
仔倡乞師於吳越

十國春秋吳世家

按路振九國志謂師周為行密所疑奔湖南實則

疑之者乃楊渥非行密也

豫章書云張顥徐溫使三將

朱思勅范遇陳瑋

從秦裴擊江

西因戍洪州誣以謀叛命別將陳祐往誅之祐間道兼行六日至洪州微服懷短兵徑入秦裴帳中裴大驚祐告之故乃召思勅等飲酒祐數以罪執斬之

按歐陽史謂顥溫誅陳瑋等即在楊渥庭中實則瑋等死於洪州非廣陵也今從十國紀年及十國春秋

五代

唐天祐六年

己巳唐亡於四年晉岐淮南猶稱唐天祐六年乃梁之開平三年也

秋七月

淮南盡取江西地

通鑑綱目

豫章書云六月危全諷自稱鎮南節度使攻洪州楚馬殷遣指揮使苑玫會袁州刺史彭彥章圍高安七月淮南遣招討使周本擊全諷全諷於象牙潭營柵臨溪亘數十里本隔溪布陣先使羸兵嘗敵全諷兵涉溪追之本乘其半濟縱兵擊之全諷兵大潰溺水

死者甚衆本分兵斷其歸路擒全諷及將士五千人  
乘勝克袁州執刺史彭彥章進攻吉州歙州刺史陶  
雅使其子敬昭及都指揮使徐章將兵襲饒信信州  
刺史危仔倡請降饒州刺史唐寶棄城走行營都指  
揮使米至誠都尉呂師造等敗苑玫於上高吉州刺  
史彭玕帥衆數千奔楚淮南以左先鋒指揮使張景  
思知信州遣行營都虞侯骨言將兵五千送之危仔  
倡聞兵至奔吳越八月虔州刺史盧光稠以州附於

淮南於是江西之地盡入楊氏光稠亦遣使附梁

七年

庚午晉岐吳稱唐天祐梁開平四年

春二月岐王承制加楊隆演嗣

吳王

同上

十國春秋云萬全感自岐歸岐王承制加王兼中書

令嗣吳王六月水軍指揮使教駢圍彭城

玠弟

於赤石

楚兵救城鹵駢去冬十二月虔州刺史盧光稠有疾

以位傳譚全播全播不受光稠卒其子延昌來奔喪

全播立而事之王遣使拜延昌虔州刺史延昌受之

復因楚通梁曰我受淮南官以緩其謀耳終當為朝廷經畧江西梁以延昌為鎮南留後是冬淮南節度判官嚴可求請置制置使於新淦縣遣兵戍之以圖虔州每更番輒潛益其兵虔人不覺也

八年

辛未晉岐吳禰唐天祐梁乾化元年

冬十二月百勝軍指揮使黎球

五代史作求

殺盧延昌而代之梁以球為虔州防禦使球

卒牙將李彥圖代知州事

十國春秋

五代史譚全播傳云乾化元年拜求防禦使求暴病

死其將李彥圖自立全播益懼遂稱疾焉杜門自絕  
彥圖死州人相率詣全播第叩門請之全播乃起遣  
使請命於梁拜防禦使

豫章書云吳淮南節度副使陳璋等進攻荆南高季  
昌遣其將倪可福拒之吳恐楚人救荆南遣撫州刺  
史劉信帥江撫袁吉信五州兵屯吉州為璋聲援

十一年

甲戌晉岐吳稱唐  
天祐梁乾化四年

夏四月吳袁州刺史劉崇景

叛附於楚楚將許貞帥萬人援之五月吳都指揮使

柴再用米志誠與劉崇景許貞戰於萬勝岡大破之  
豫章書

劉威傳云子崇景官袁州刺史叛附於楚為柴再用  
所破棄袁州遁去

十四年

丁丑晉岐吳稱唐  
天祐梁貞明年

春三月楚馬存寇上高

十國春秋

十五年

戊寅晉岐吳稱唐  
天祐梁貞明年

冬十一月吳取虔州

通鑑綱目

十國春秋云正月以右都押牙王祺為行營都指揮  
使將洪撫袁吉之兵擊譚全播於虔州嚴可求以厚



利募贛石水工吳兵奄至城下虔人始知之

熟於水道故舟

行無碑

七月軍中大疫王祺病以鎮南節度使劉信為

虔州行營招討使全播乞師鄰境吳越閩楚皆出師救之楚將張可求將萬人屯古亭閩兵屯雩都吳越錢傳球帥兵二萬圍信州信州兵才數百逆戰不利刺史周本開門宴飲飛矢雨集安坐不動吳越疑有伏兵解圍去八月劉信遣其將張宣夜襲楚兵與張可求戰於古亭大破之又遣梁詮等擊吳越及閩兵

二國聞楚兵敗引去九月信攻虔州不克取質而還  
徐溫怒益兵使更攻之十一月信還擊虔州先鋒始  
至虔兵皆潰遂拔虔州追執全播於雩都以全播為  
右威衛將軍領百勝軍節度使

十六年

己卯晉岐稱唐天祐梁  
貞明五年吳武義元年

夏四月吳王隆演建國

改元冬十二月吳團結民兵

通鑑綱目

十國春秋云以徐知誥為左僕射參政事兼知內外  
諸軍事仍領江州團鍊使五月荊南為楚人所攻乞

援遣鎮南節度使劉信等率洪吉撫信步兵自劉陽趣

潭州使李簡等統水軍攻楚

十八年

辛巳晉陂稱唐天祐梁龍德元年吳楊溥順義元年

冬十月加徐知誥同

平章事領江州觀察使尋以江州為奉化軍以知誥領節度使

後唐明宗天成二年

丁亥吳乾貞元年

冬十一月吳王楊溥稱

帝

通鑑綱目

長興四年

癸巳吳太和中五年

冬十一月吳信州刺史蔣延徽引

兵攻建州

同上

十國春秋云秋七月閩建州土豪吳光帥衆來奔且請兵冬十一月信州刺史蔣延徽擅引兵會吳光攻建州

按豫章書誤載乾貞五年據五代史十國春秋吳楊溥乾貞二年後即改元太和無乾貞五年也

後晉高祖天福二年

丁酉南唐昇元元年

秋七月吳徐誥稱帝國

號唐奉吳主為讓皇

同上

七年

士寅南唐昇元六年

夏五月唐以宋齊邱為鎮南節度使

同上

八年

癸卯南唐保大元年

冬十月張遇賢侵唐境唐遣兵擒斬之

同上

馬令南唐書云妖賊張遇賢

循州盜

聚衆十餘萬陷虔

州諸縣虔州城守遇賢據白雲洞命洪州營屯都虔

侯巖思禮

一作巖思

通事舍人邊鎬討賊擒遇賢及賊副

黃伯雄謀主僧曹景全斬於建康市

陸游南唐書云虔有書生白昌裕沈密有謀邊鎬引

與定計刊木開道襲白雲洞會遇賢所事神棄去不復降語賊衆遂潰其裨將李台執之以降

齊王開運元年

甲辰南唐保大二年

冬十二月唐以查文徽為江

西安撫使

豫章書

十國春秋云樞密使查文徽請伐殷詔以文徽為江西安撫使俾覘建州文徽固請濟師乃以邊鎬為行營招討諸軍都虞侯共攻殷敗績於蓋竹明年七月邊鎬拔鐔州八月執其主王延政歸

三年

丙午南唐保大四年

秋八月陳覺擅發撫信州兵趨福州

十國

春秋

後漢隱帝乾祐三年

庚戌仍高祖號南唐保大八年

冬十一月邊鎬統

信州屯兵以覘楚

南唐書

後周太祖廣順元年

辛亥南唐保大九年

秋九月命邊鎬出萍鄉

以討楚亂

十國春秋

南唐書云邊鎬以信州屯兵出宜春討長沙破其軍

於龍回關徐威等以希崇降希萼亦送款於鎬鎬盡

遷馬氏之族於金陵以希萼為洪州大都督

二年

壬子南唐保大十年

春正月以湖南行營糧料使王紹顏為

筠州

分洪州高安縣置

刺史

南唐書

世宗顯德三年

丙辰南唐保大十四年

春三月唐遣將軍柴克宏

再用子

將兵救常州敗吳越兵

通鑑綱目

柴克宏傳云克宏為撫州刺史會淮南交兵吳越伺

間侵常州克宏請効死行陳元宗嘉其志授右衛將

軍遣與袁州刺史陸孟俊同救常州大破之



五年

戊午南唐  
中興元年

春三月唐以太弟晉王景遂為洪州大

都督夏五月唐主更名景去帝號奉周正朔

同上

六年

己未秋九月唐以洪州為南都

十國春秋云國主議徙都洪州曰建康與敵境隔江  
而已今吾徙都豫章據上流而制根本上策也羣臣  
多不欲惟樞密使唐鑑贊成之

宋

太祖建隆二年

辛酉

春二月唐徙都洪州

綱目續編

十國春秋云國主遷於南都立吳王從嘉為太子留  
金陵監國南都迫隘上下不能容羣心思歸國主鬱  
鬱不樂唐錡慚懼發瘍卒復議東遷未及行國主疾  
殂

乾德三年

乙丑南唐後主煜三年

秋九月召南都留守鄧王從益

還都以鄂州林仁肇為南都留守南昌尹

南唐書

開寶五年

壬申春二月江南主殺其南都留守林仁肇

綱目

續編

林仁肇傳云初仁肇密言於後主曰宋淮南諸州戍守單弱連年出兵滅西蜀平荆朗今又取嶺表往返數千里師旅罷敝此在兵家為有可乘之勢請假臣兵數萬出壽春渡淝淮據正陽因其思舊之民累年之粟復取淮甸勢如轉丸臣起兵日仍馳聞北朝言臣據兵竊叛事成歸國否則請族臣以明陛下無二後主驚曰無妄言宗社斬矣仁肇素起家行伍雖任將帥與士卒均食同服故多得士心宋太祖忌仁肇

名賂其侍者竊取仁肇像懸別室時楚國公從善質於汴引觀之曰仁肇行且降先持此為信耳又指空館曰將以此賜仁肇後主聞之不知其行間也潛使人酖仁肇陳喬歎曰事勢如此而殺忠臣吾不知死所矣

七年

甲戌

秋九月遣曹彬將兵伐江南

宋通鑑

宋本紀云將行夜召彬入禁中語曰南方之事一以委卿切勿暴略生民務廣威信使自歸順不必急攻

南唐書云袁州萍鄉制置使劉茂忠破潭師於境內  
拜茂忠袁州刺史

八年<sub>乙亥</sub>春二月江南遣使召神衛軍都虞侯朱令贇以

上江兵入援冬十一月江南主煜降

綱目續編

南唐書云洪州節度使朱令贇將兵一十五萬屯潯  
陽湖口與諸將議曰若前進而北師反據我後則上  
江阻隔乏糧道亟為鹵矣乃以書招南都留守劉  
克貞代鎮湖口克貞以病留令贇亦未進國主累促

之令贊以長筏大艦帥水陸諸軍至虎蹲洲與王師  
遇舟筏俱焚令贊死餘衆皆潰

劉茂宏傳云金陵平後主入朝吉州刺史申屠令堅  
約茂宏為亂事未發而令堅卒茂忠遂降

宋史王明傳云明破江州軍獲船十餘艘敗湖口軍  
奪戰艦五百遇南唐將朱令贊將焚采石浮梁明帥  
所部舟師屯獨樹口密樹長木於洲浦間若帆檣狀  
令贊疑大軍襲其後逗撓不敢進明移檄諸軍相為

倚角至小孤山合勢大破之擒令贄卒大半皆赴水  
死金陵平詔明安撫諸郡擢知洪州

九年

丙子

春三月曹翰屠江州殺江南守將胡則

同上

胡則傳云為江州指揮使金陵陷曹彬迫後主以手  
書命郡縣悉降書至江州刺史謝彥賓謀納款則率  
宋德明等入攻彥賓執而殺之衆推為刺史則嘗從  
劉仁贍為壽州裨將盡得其城守方略於是日夜閱  
丁壯勒部伍為堅壁死守計命南面行營招安巡檢

使曹翰攻之城帶江負山樓櫓高險不可破屢遣使  
諭降則誓死不從翰軍死傷者無算詔書切責督戰  
會則疾革城始陷翰將礮之俄死腰斬其屍以徇殺  
宋德明而墮其城七尺使後不可守翰屠城死者數  
萬人取屍投江流及井坎皆滿民間貨貨鉅萬翰掩  
而有之凡發大艦十餘艘悉載金帛置廬山鐵羅漢  
像於上號曰押綱羅漢

太宗太平興國四年

己未改建武軍為建昌軍

豫章書



七年

壬午

以江州星子縣置南康軍

王存九域志

淳化元年

庚寅

冬十一月以虔州大庾縣置南安軍

同上

楊允恭傳云太宗命為廣連都巡檢使時鹽自嶺入盜販者衆允恭請建大庾縣為軍輦鹽官車以免其患詔建為南安軍有葉姓賊衆五百餘往來海上允恭集水軍掩襲斬之復奪還婦女六十餘口賊平詔書嘉獎賜錢十萬

三年

壬辰

以筠州之清江建臨江軍

宋史地理志

允恭傳云命董江南水運兼捕寇盜行及臨江軍擇驍卒拏輕舟夜伺其出沒獲賊百餘悉梟其首

按大志揚允恭請建南安軍捕斬臨江賊誤載太平興國中今從宋史本傳

至道三年

丁酉

春正月分天下州軍為十五路

綱目續編

顧祖禹方輿紀要云江南路領州十三饒州撫州江州洪州袁州吉州虔州信州筠州屬焉軍六南康軍臨江軍南安軍建昌軍屬焉

真宗大中祥符四年

辛亥

秋九月陞洪州長史兼安撫使

內出綏撫十六條頒之

宋史本紀

仁宗皇祐四年

壬辰

秋七月儂智高陷昭州以孫沔為湖

南江西安撫使

綱目續編

孫沔傳云儂寇反沔入見言西事不煩聖慮當以嶺

南為憂臣觀賊勢方張官軍朝夕當有敗明日果聞

蔣偕死帝諭執政誠如沔料龐籍奏為湖南江西安

撫使兼廣南東西路以便宜行事請益發騎兵增選

偏裨求武庫精甲憂賊度嶺而北檄召湖南北大兵  
繕治營壘多具宴犒賊疑不敢進會遣狄青與沔會

遂敗智高

青平儂智高  
在五年正月

英宗治平元年

甲辰以蔡挺提點江西刑獄兼提舉虔州

鹽法時鹽寇千百為羣患苦州縣挺諭所部與期使

自首納器甲原其罪得兵械萬計盜賊從此衰息

宋史

列傳

徽宗宣和二年

庚子夏四月江西添設提刑都監一員以

西界羣盜嘯聚也

豫章書

饒州事考云宣和二年餘干楊彥興假佛聚衆知縣朱公彥具反狀會方臘亂彥興與其黨五百人奔附道遇捕臘兵盡殺之

欽宗靖康元年

丙午

冬十月安置李綱於建昌軍十一月

南道都總管張叔夜將兵勤王

綱目續編

李綱傳云除河東北宣撫使時方議和詔止綱進兵未幾召赴闕除知揚州言者追論綱主戰喪師費財

落職奉祠俄責授保靜軍節度副使建昌安置

張叔夜傳云時四道置帥令叔夜領南道都總管金兵再至詔趣入衛即自將中軍子伯奮將前軍仲熊將後軍合三萬人轉戰而前十一月晦至都

高宗建炎元年

丁未

陞洪州為帥府

宋史地理志

馮琦宋史紀事云冬十二月盜張遇犯江州

遇後為劉安世

所破降於王淵

三年

己酉

秋七月詔李邴滕康權知三省樞密院事奉隆

祐太后如洪州九月命劉光世移屯江州冬十月金人趨江西光世引兵遁十一月隆祐太后如虔州江

西州軍多陷

綱目續編

孟后傳云太后至建康會防秋迫命劉寧止制置江浙衛往洪州百司非預軍事者悉從復慮敵人來侵命楊惟忠將兵萬人為衛密諭同行滕康劉珪緩急取太后旨便宜以行會劉光世屯江州不為備金果自大冶縣徑趣洪州康珪奉太后行次吉州金人追

急御舟夜行質明至太和縣舟人景信反惟忠兵潰  
失宮人百六十人康珏俱遁兵衛不滿百亟趨虔州  
時虔州府庫皆空衛軍所給皆沙錢市買不售與百  
姓交鬪縱火肆掠土豪陳新率衆圍城康珏等弗能  
禁惟忠步將胡友自外引兵破新於城下

劉光世傳云隆祐太后在南昌命移屯江州為屏蔽  
既至日置酒高會金人由黃州渡江三日無知之者  
太后退保虔州光世遁



豫章書云冬十月兀朮分兵一自滁和入江東一自  
蘄黃入江西劉光世及知江州韓紹勳十一月滕康  
劉珣聞金兵至奉太后出城江西制置使王子獻棄  
洪州遁金人陷臨江軍守臣吳將之遁陷洪袁撫守  
臣李積中王仲山王仲巖降太后至吉州方五日金  
人追之急乘舟夜行至太和縣後自萬安陸行如虔  
州太后及潘貴妃以農夫肩輿而行金人陷吉州守  
臣楊淵遁叛軍護衛楊世雄犯永豐知縣趙訓之死之金

人犯建昌軍兵馬監押蔡延世擊却之十二月金人

屠洪州

四年

庚戌

春三月遣盧益辛企宗奉迎太后東還夏五月

置沿江三路安撫大使朱勝非除江州路秋八月李

成降詔江州撫納之九月命楊惟忠屯江州李成遣

馬進犯江州命惟忠及王玘討之冬十月虔州賊李

敦仁舉兵破石城縣十一月呂頤浩會惟忠與馬進

戰不利遣巨師古救江州亦為所敗詔王玘孔彥舟

連援之十二月馬進分兵犯洪州李敦仁犯撫州圍建昌又犯汀州頤浩遣統置閭皋通判蔡延世襲擊擒其弟世雄世臣

宋史本紀

呂頤浩傳云除江東安撫大使兼知池州駐軍鄱陽值馬進圍江州遣巨師古赴援失利奔洪州上以頤浩奮不顧身為人所難但失於輕進詔王玠以萬人速往策應頤浩復軍左蠡得崔增衆萬餘勢復振王德傳云劉光世屯九江以便宜復德為前軍統制

饒州賊劉文舜圍城德引兵誅之自餘請降不戮一人貴溪妖賊王宗石以念經為名時在信州德倍道鼓行擒獻於朝

饒州事考云四月賊張頂花陷浮梁攝令郭侁死之贛州謝志云虔州賊李敦仁舉兵破石城縣邑人陳皓及子敏力戰斬李世昌生擒李世立收復石城

紹興元年

辛亥

春正月命張俊為江淮路招討使岳飛副

之江州陷守臣姚舜明棄城走端明殿學士王易簡

等二百人皆遇害呂頤浩遣王玘崔增擊李成於湖  
口大破之及惟忠引兵趨江州二月曹成黨馬友犯  
筠州守臣王庭秀棄城犯臨江軍守臣康倬遁三月  
張俊趨豫章與楊沂中岳飛大敗馬進復筠州成聞  
進敗自引兵來過於樓子莊又大破之成勢迫絕江  
而去遂復江州詔奪成官募人擒斬赦其脇從進復  
寇江州沂中趙密引兵追擊又大敗之成奔蘄州夏  
六月南安賊吳忠作亂秋七月後軍將胡江等叛破

玉山弋陽永豐三縣遣樞密院準備將領徐文討之

張琪犯饒州閩皋擊敗之降其黨姚興

琪為王林所擒

冬十

月范汝為復叛入建州追辛企宗三官以孟庾為福建江西荆湖宣撫使副以韓世忠討之十一月曹成

犯安仁執安撫向子謹

同上

張俊傳云改江淮以南招討使請討巨盜孔彥舟張用李成時成圍江州其黨馬進在筠州豫章介江筠之間俊聞命亟趨入豫章喜曰我已得洪州破賊必

矣歛兵城中息金鼓禁人登城賊以為怯居月餘遣人索戰大書來牒俊細書報之尋諜知賊怠徑由上流絕生米渡出賊不意追奔七十里至筠州賊背河而陣率步兵當其前以精騎授楊沂中陳思恭約於午時從山後夾擊鏖戰及期精騎自山馳下賊駭亂退走遂復筠州追至奉新北樓子莊成黨商元據草山挾險設伏俊遣步兵從間道直趨山椒殺伏奪險乘勝追至江州賊勢危迫絕江而遁呼為張鐵山江

州已復引兵渡江追殺馬進成北走降劉豫

岳飛傳云李成將馬進犯洪州連營西山飛請於張俊曰賊貪而不慮後若以輕兵絕生米渡出不意破之必矣俊大喜因以為前鋒飛重鎧躍馬潛出賊右突其陣所部從之進大敗走筠州飛抵城東賊布陣十五里飛先設伏以待選騎二百以紅羅為幟上刺岳字騎隨幟而前賊易其少薄之伏發敗走使人大呼曰不從賊者坐吾不汝殺坐而降者八萬進與餘



卒奔南康飛夜引兵至朱家山斬其將趙萬成聞自  
引兵十餘萬來過於樓子莊復大破之追斬進時張  
用方寇江西飛以書招之曰吾汝同里南薰門鐵路  
步之戰皆汝所悉欲戰則出不戰則降用得書遂降  
江淮悉平俊奏飛功第一加神武右軍副統制留洪  
州彈壓盜賊建寇范汝為將攻撫州飛遣人植岳字  
旗於城門賊畏不敢犯已而賊黨逼建昌飛遣將討  
擒之

楊沂中傳云

紹興十一年  
賜名存中

破馬進於王隆觀追至筠

州成自將十萬衆來援夾河而營沂中說俊曰彼衆  
我寡當出奇破之願以騎見屬公引步兵居前俊從  
之即夜銜枚渡筠河出西山馳下擊賊俊步兵夾攻  
俘八千人方戰未休諸將慮降卒有變沂中曰殺降  
吾不忍諸將轉告俊竟坑之

江西大志云賊帥張琪自徽犯饒州有衆五萬呂頤  
浩自左蠡班師命其將閻皋姚端崔邦弼列陣以待

琪犯梟軍梟力戰端邦弼兩軍夾擊大破之

豫章書云六月南安賊吳忠宋破壇劉洞天作亂江西提刑司遣官討賊破壇洞天伏誅忠遁七月虔州賊陳顥作亂九月詔江西路安撫使復治洪州楊惟忠知江州兼安撫使十一月范汝為犯光澤縣李山走信州十二月遣江東安撫司統制顏孝恭討建昌軍賊

金谿兵氛志云七月賊潘奎等寇金谿鄧傅二社兵

追殺之於上幕鎮

二年

壬子

春正月楊惟忠誘誅楊勅夏六月詔孟庾還岳

飛駐江州召呂頤浩入朝以孟庾同都督江淮荆浙  
諸軍事冬十月置饒州馬監知建昌軍朱芾擒斬石  
陂賊余照顏孝恭復招降餘黨李寶等十二月虔州  
賊謝達犯惠州陳顥陷汀州圍潮州不下引兵趨江

西 宋史宏簡錄

岳飛傳云二年曹成擁衆由江西歷湖湘據道賀二

州命飛權荊湖東路安撫都總管嶺表平授武安軍承宣使屯江州安撫李回檄捕劇賊馬友郝通劉忠李通李宗亮張式皆平之

韓世忠傳云建州捷聞加賜黃金器皿因奏江西湖南寇尚多請乘勝討平之時曹成方擁衆榔邵世忠忽由處信徑至豫章連營數十里賊不虞其至大驚遣人招降之得戰士八萬遣詣行在

豫章書云三月李敦仁降及其徒皆授官四月陳顥

焚龍川縣命江西安撫司討之江西賊趙進寇瑞昌縣楊惟忠討降之八月江西統制傅樞討南雄賊吳忠鄧慶劉軍一平之

三年

癸丑

春正月江西將李宗諒誘戍兵寇筠州遣統領

趙進擊降斬之二月虔吉盜

周十隆等

連兵犯循梅汀州

詔岳飛合兵捕之夏五月知建昌軍朱芾討南豐縣賊誅其魁黃琛六月岳飛遣張憲王貴擒斬虔賊彭友餘悉降曲赦虔州命飛班師留兵三千屯駐虔廣

彈壓盜賊八月詔飛赴行在留兵萬人戍江州九月以飛  
為江南西路制置使置司江州

同上

岳飛傳云三年宣諭劉大中奏令飛討虔吉諸郡盜  
賊固石洞賊彭友悉衆迎戰躍馬馳突飛麾戈即馬  
上擒之餘酋退保其洞高峻環水止一徑可入飛列  
騎山下令皆持滿遣死士潛入賊巢黎明奮擊賊潰  
蔽山而下騎兵圍之賊號呼丐命飛令勿殺受其降  
初以隆祐太后震驚之故密旨令屠虔飛請宥不許

請至三四帝乃曲赦虔虔人感其德繪像祠之萍鄉  
餘寇犯袁州授統領徐慶王貴方略未幾悉平九月  
自江州來朝帝手書精忠岳飛字製旗以賜改鎮南  
軍承宣使江南西路沿江制置使神武後軍都統制  
偏將李山吳全吳錫李橫牛皋皆隸焉

四年

甲寅

秋七月建昌軍將修達等亂殺守臣劉滂江西

制置使胡世將遣叅謀侯懋統制邱贊共討之侯懋  
擊斬修達八月周十隆降為官軍所掠復遁冬十月



復以王瓊為江西制置使

豫章書

五年

乙卯

冬十一月以李綱為江西安撫制置大使

綱目

續編

宋本紀云是歲虔賊周十隆降復叛

李忠定奏議云虔賊周十隆等於正月內結集賊徒在虔化等縣殺人放火本軍遷延寇賊滋蔓累經招安授官反復作過理難容貸三月十四日奉旨除賊首周十隆不赦外其餘徒衆許其自新仰李貴統率

官軍前去措置招捕其擒獲人依格推賞招到徒黨  
並時免罪將脇從并老弱人放令歸業留強壯人隨  
軍務

贛州志云周十隆張大閑謝凱尹寶謝小鬼等攻破  
興國雩都虔化瑞金等縣安撫使李綱遣州將何榮  
申討之復興國縣追至贛縣界殺死賊衆五百餘人  
後統制官李貴入寨招諭其黨悉就撫而十隆不從

六年

丙辰

夏四月命岳飛自九江進屯襄陽

宋史本紀

七年

丁巳夏

五月詔李綱趣捕虔吉諸盜責諸縣各募兵

訓練秋七月酈瓊叛降劉豫詔岳飛屯江州為淮浙

聲援閏十月李綱罷

同上

八年

戊午秋

八月遣御史李寀宣諭江西措置盜賊

豫章書

九年

己未春

二月江西統制官李貴以其軍歸楊沂中

宋史

本紀

十一年

辛酉春

正月兀朮由壽春府渡淮復陷廬州命岳

飛屯江州

同上

豫章書云二月虔吉州盜悉平五月置江西總領軍  
馬錢糧官十一月江西兵馬都監程師回討歐幻四  
等平之

二十年

庚午

夏四月信州妖賊黃曾等作亂陷貴溪縣江

西兵馬鈐轄李橫等討平之

宋史宏簡錄

二十一年

辛未

秋七月虔州軍卒齊述殺統制吳進同總

領馬晟據州叛八月遣殿前遊奕軍統制李耕討之

冬十一月李耕入虔盡誅叛兵事遂平

同上

大志云虔州軍亂遣鄂州都統田師中發兵同江西安撫使張澄遊奕軍統制李耕左翼軍統制陳敏相繼討之就命李耕知虔州後耕入虔州盡誅叛卒

贛州謝志云七月東南第六將校齊述以八營四千人據州以叛脅附者又四千人高宗命神龍衛四廂都指揮使忠州團練使李耕護殿陛之師致討尋命守虔耕至軍於獅子岡劉綱以洪州兵駐城之東南張寧以循州兵駐城之南張訓通以鄂州兵駐於北

陳敏以福建兵駐於東鄧酢以寧都兵扼水東王歷  
陳修年以漕屬給餉十一月耕促雲梯天橋徑薄東  
北隅神臂弓交發命中礮十三梢飛石相屬敢死士  
先登賊棄城巷戰耕督麾下躍之賊敗絕西城訓通  
網扼其衝半溺於江餘轉走城突張寧寨士鏖戰一  
賊不得縱耕築京觀列功狀以聞將士遷秩有差

二十三年

癸酉

春二月巒虔州叛卒黃明等

凡八人

於都市

改虔州為贛州

豫章書

三十年

庚辰

夏五月初置江州都統制以步軍司都統制

戚方為之六月以江西米茶充江州軍費

同上

按宋本紀戚方領屯在是年九月非五月也

三十一年

辛巳

夏六月金人復寇以劉錡為江淮浙西制

置使節制逐路兵馬

宋史列傳

孝宗隆興元年

癸未

夏五月安置李顯忠筠州冬十月陞

洪州為隆興府

宋史本紀

豫章書云以符離之敗李顯忠責授果州團練副使

筠州安置而邵宏淵仍前建康都統制後朝廷知其

故復顯忠太尉奉祠

二年

中夏

五月責邵宏淵靖州團練副使放南安軍

同上

乾道二年

丙戌

春正月裁江州軍額一萬

同上

三年

丁亥

春正月復江州所罷屯兵

豫章書

四年

戊子

閏七月戚方坐交結內侍竄信州復徙潭州籍

所盜庫金以犒軍

宋史宏簡錄

四年

戊子

夏五月饒信饑民嘯聚遣官措置賑濟

同上



七年

辛卯

江西路旱賑之募民為兵

同上

淳熙二年

乙未

夏四月茶寇賴文政由湖北入湖南數敗

官軍命辛棄疾節制江州都統皇甫倜調兵捕之六

月命賑江西被寇州縣仍蠲租稅茶寇轉犯廣東治

失律罪編管江西總管賈和仲閏九月棄疾誘文政

殺之茶寇平

同上

辛棄疾傳云提點江西刑獄平劇盜賴文政有功歷

遷湖北湖南運副疏陳比年以來李全賴文政陳子

明李峒相繼竊發皆能一呼嘯聚千百殺掠吏民至煩大兵翦滅良由州以趣辦財賦為急吏之殘害民物者州不敢問縣以並緣科歛為急吏之剥下奉上者縣不暇問田野之民始酷於聚歛中苦於科率及其終也豪民兼并盜賊剽奪相因而起欲望陛下深思致盜之由講求弭盜之術申飭州縣以惠養元元為意有違法貪冒者使諸司各揚其職無徒按舉小吏以應故事

三年

丙申

詔選江州水軍一千人

九江兵防志

十五年

戊申

夏六月以江西提刑朱熹為兵部郎官未上

而罷

綱目續編

宋史本傳云除兵部郎官以足疾辭上封事言急務有六其一論軍政云凡諸將求進必先培植士卒以自結於權倖而後姓名達於貴將貴將以付之軍中使自什伍而上節次保明稱其材武然後具奏陛下但見等級推先案牘具備誠以為公薦豈知其論價

輸錢為債帥哉彼有智勇材畧之人孰肯抑心下氣  
於宦官宮妾之門而陛下所得以為將帥者皆庸夫  
走卒猶望其修明軍政激勸士卒以強國勢豈不誤  
哉

寧宗開禧二年

丙寅

夏四月江州統制許進復新息縣五

月江西都統王大節攻蔡州不克軍潰冬十二月謫

郭倪果州副團練竄南康軍

宋史本紀

豫章書云韓侂冑銳意用兵錢象祖執不可遂以懷

姦避事罷之尋奪二官信州居住六月諸軍俱敗王  
大節除名袁州安置奪皇甫斌五官南安軍安置  
范應鈴傳云開禧中知吉州贛叛卒朱先賊殺主帥  
應鈴曰此非小變也密遣諜厚賞捕之

嘉定二年<sub>己巳</sub>冬十一月廣南黑風峒寇李元礪復作亂

連破諸縣詔遣荆鄂江池四州軍討之十二月吉州

南安軍盜起

<sub>同上</sub>

三年<sub>庚午</sub>春二月以工部侍郎王居安知隆興府督捕峒

寇夏六月江州副統劉元鼎及池州副統許俊與李

元礪戰皆不利賊勢愈熾冬十二月湖南賊羅世傳

縛元礪以降峒寇悉平

同上

大志云淳熙

當作嘉定

間王居安知隆興府李元礪陳廷

佐倡亂掀永新撇龍泉江西列城皆震居安督戰於

黃山賊始懼走

四年

辛未

春二月李元礪伏誅賞平峒寇功授羅世傳通

直郎尋復叛為其黨所殺閏月罪諸路帥臣監司守

令格廢賑卹之令及盜發不即捕者

同上

十二年

己卯

春二月遣殿前司八千兵防捍江西

宋史宏

簡錄

十四年

辛巳

春二月詔江西權殿前司職司馮榭援蘄黃

榭不果行

豫章書

理宗紹定二年

己丑

秋九月石城張過龍文勝反於平固

連破石城寧瑞興雩五縣安撫李壽明通判趙彥覃

督兵討平之

贛州兵寇志

三年庚寅春二月詔復賴吉建昌凡蠻獠竊發經擾郡縣

賦稅一年宋史本紀

撫州景定志云紹定三年春汀寇入宜黃焚崇仁郡城大震帥閩遣遊奕軍來援兼檄鄧傳二社兵暨坊團義兵登陴設備賊遁閏二月復犯金谿南境鄧傳兵馳歸逐之王師踵至賊遂平

劉堦汀寇紀略云己丑歲十月廖十六廖雲廖雷輩由廣昌來犯南豐西門知縣王日宣備禦無策賊陷



城留一夕而去調江州兵百屯安禪寺戍守十二月  
調馮將屯西門翼日賊猝至馮被殺長驅入郭火官  
府民廬幾盡乃去攻建昌明年日宣以失守被劾選  
南城楊尉應廉來莅邑朝命御前諸軍副都統制夏  
訓武友諒將池司步騎至又命蔡將某率荆湖步騎  
至張總管率步兵至進屯廣昌賊遁松梓山池司兵  
攻破之時又起復陳工部韡知南劍州兼福建提刑  
江西招捕之職犄角平寇陳有威名多方略招致廖

寇俱隸麾下亂遂以平

六年

癸巳

陳韡進寶章閣待制知隆興府贛寇陳三槍據

松梓山砦出江廣所至殘虐遣官吏諭降輒殺之韡

乃決計除蕩十一月詔節制江西廣東福建三路捕

寇軍馬

宋史本傳

端平元年

甲午

春正月陳韡進華文閣待制江西安撫使

兼知贛州至則斬將士之張皇賊勢及掠子女貨財

者齊敏李大聲所至克捷分兵守大石堡斷賊糧道

遂破松梓山親督諸將乘春瘴未生薄山下賊悉精  
銳迎敵韓軍步騎夾擊縱火焚其巢賊首張魔王自  
焚斬千五百級擒賊將十二得所掠婦女牛馬及僭  
偽服物各數百三槍中箭而遁追及下黃又敗之遁  
至興寧就擒斬隆興市所踣三路數州六十砦悉平  
之

同上

二年

乙未

秋七月知棗陽劉子澄棄城遁削秩貶瑞州

宋史

本紀

豫章書云十二月魏了翁開府江州了翁在朝凡六月前後二十餘疏皆當世急務帝將引以共政忌者合謀排擯之且言了翁知兵乃命出視師賜便宜詔書如張浚故事了翁以吳潛為叅謀官趙善湘馬光祖為叅議官

三年

丙申

春二月復召了翁赴闕以陳韡為沿江制置使

冬十月昆布哈入淮西詔陳韡應援

同上

嘉熙二年

戊戌

春二月以史嵩之叅知政事督視京湖江

西軍馬三月高定子為中書舍人叅贊京湖江西軍

事豫章書

三年

己亥

夏四月吳潤權工部尚書沿江制置副使知江

州秋七月董槐知江州兼都督行府叅議官

同上

大志云嘉熙間江西峒丁反吉州萬安宰黃炳鳩兵

守備一日五更報寇至炳亟遣卒迎敵衆曰空腹奈

何炳曰第行飯即至率吏輩攜食桶沿市呼曰知縣

買飯民罄釜與之士卒皆飽一戰破寇

淳祐二年

壬寅

進董槐直龍圖閣沿江制置使知江州主

管江西安撫司公事蒐討軍實常若敵至裨將盧淵

凶猾不受命槐斬之一軍肅然

宋史本傳

五年

乙巳

夏五月從趙葵請詔江西造輕捷戰船置遊擊

軍分備捍禦

宋史本紀

十二年

壬子

夏五月盜起玉山縣罷諸郡經界六月癸亥

平之

同上

寶祐六年

戊午

賊張半天何白眉等率百衆寇南豐吏余

璋急斷浮橋賊憊水東官民俱逃逮昏賊始渡焚燒

民廬市肆明日乃歸巢

在木瓜山石半峒

諸司調撫贛旗馬

軍合寨尉卒進討擒其魁渠赴建昌凌遲梟令

汀寇紀畧

開慶元年

己未秋

八月蒙古自黃州渡江侵臨江軍知軍

陳元桂死之九月詔賈似道兼節制江西二廣人馬

通融應接冬十月移馬光祖江州副使

宋史本紀

趙葵傳云開慶元年改隆興饒江徽州防拓調遣兼判建康元將烏蘭哈達破湖南傳檄數宋背盟之罪

理宗大懼冬十月改江東西宣撫加益國公節制調遣饒信袁臨撫吉隆興官軍民兵以禦之兼訪問百姓疾苦罷行黜陟並許便宜從事給以緡錢銀絹措用

豫章書云八月蒙古兵至臨江時制置使徐敏子在隆興頓兵不進知軍事陳元桂力疾登城督戰不能敵有欲抱而走者元桂曰死不可去左右俱遁兵至元桂瞠目叱罵遂遇害懸其首於敵樓蒙古入瑞州



知州陳昌世素有善政百姓擁之以逃十一月蒙古  
兵在潭江西大震左丞相吳潛用御史饒應子言移  
賈似道於黃州黃雖下流實當兵衝孫虎臣以精騎  
七百送之至蘋草坪候騎言前有北兵似道大懼虎  
臣請出戰似道嘆曰死矣惜不光明俊偉爾及北兵  
至乃老弱部掠金帛子女而還者江西降將儲再興  
騎牛先之虎臣擒再興似道遂入黃州

景定元年

庚申

冬十二月印應雷直徽猷閣知江州主管

江西安撫司公事節制蘄黃興國三郡是歲蠲江西

被兵州郡兩稅

同上

豫章書云秋七月吳潛奪觀文殿大學士罷祠削二

秩謫居建昌軍

二年

辛酉

秋八月謝枋得募民兵守信州冬十二月竄蒲

擇之於南康軍

豫章書

謝枋得傳云趙葵給錢萬緡使募兵因說鄧傳二李

諸大家得丁力萬餘守信州

續綱目云賈似道忌功欲污巖一時間臣遣官會計  
邊費於是趙葵史巖之等皆坐侵盜掩匿罷官徵償  
及會計者至信枋得曰不可以累宣撫自償萬緡餘  
不能辦乃上書似道有云千金而募徙木將取信於  
市人二卯而棄干城豈可聞於鄰國遂得免徵餘者  
三年壬戌春三月汪立信差知江州主管江西安撫司公  
事秋七月江州都統聶世興調遣入蜀託疾憚行詔  
奪二秩押往京湖制司自效

宋史本紀

度宗咸淳四年

戊辰

秋八月賊羅動天詹花五等以百餘

衆破南豐駐半日焚治寺民居市肆殺掠而去諸司

調兵討平之誅其渠魁

訂寇紀畧

六年

庚午

春三月立贛吉安要衝四砦

宋史本紀

豫章書云吉贛南安數被寇寇出沒無時砦卒莫能  
相援因即要害立四砦每砦屯兵百地勢聯絡禦寇  
為便擇三郡將官領之

十年

甲戌七月度宗  
崩太子焘即位

冬十一月命趙潛巡江策應賜錢

百萬激賞戰功十二月呂師夔請於江州募兵詔知  
州錢真孫同募豫給以尚書省錢米命賈似道都督  
諸路軍馬呂師夔黃萬石李珣叅贊軍務孫虎臣總

統諸軍

同上

帝熈德祐元年

元<sub>上</sub>亥元至  
元十二年

春正月呂師夔錢真孫遣人

於蘄州請降元兵徇江州知壽昌軍胡夢麟寓治自  
殺知南康軍葉闇詣降二月轉黃萬石江西路制置  
使壬戌元兵徇饒州通判萬道同以城降知隆興吳

益棄城遁甲子至臨江知軍鮑廉死之乙丑詔張世傑將兵入衛便道復取饒州其將謝元王海李旺袁恩呂再興戰死各贈十官丙寅文天祥起兵勤王三月趣呂文福入衛行至饒州殺使者入江州降夏四月總統張敏戰死豐城贈五官錄其一子五月貶潛說友南安軍贈鮑廉直文華閣官一子六月江西制置黃萬石移治撫州詔還隆興府冬十一月壬午元兵至隆興府萬石奔撫州運判劉槃通判施至道以

城降甲午萬石提兵走建昌軍

同上

文天祥傳云知贛州兼江西安撫使德祐元年詔天  
下勤王天祥捧詔大慟使方興召吉州兵諸豪傑皆  
響應有衆萬人將入衛其友止之曰今元兵三道鼓  
行破畿甸薄內地君以區區烏合赴之何異驅羊搏  
虎乎天祥曰吾亦知其然顧不自量力欲以身殉庶  
天下忠臣義士有聞風而起者耳天祥上疏乞分天  
下為四鎮建都督統御於其中以廣西益湖南建閩

長沙以廣東益江西建閩隆興以福建益江東建閩  
番陽以淮西益淮東建閩揚州責長沙取鄂責隆興  
取蘄黃責番陽取江東責揚州取兩淮使其地大力  
衆足以抗敵約日齊奮有進無退日夜圖之彼備多  
力分疲於奔命而吾民之豪傑者又伺間出於其中  
如此則敵不難破也不報

謝枋得傳云元年起為江西招諭使以兵逆呂師夔  
呂軍馳至射之矢及馬前枋得走入安仁調淮士張



孝忠逆戰團湖坪方坐敵樓見孝忠馬奔歸大驚果  
中流矢死師夔下安仁信州不守枋得棄妻子入建

寧唐石山

信州之敗綱目  
在二年正月

陳奎傳云謝枋得起兵安仁首辟奎入幕執安仁令

李景景請以家貲二萬贖罪責曰普天之下莫非王

土爾家財獨非朝廷物耶斬之景子率鄉兵五千報

怨奎度勢不敵引兵趨信州攝郡事後兵敗入積煙

山中自刎死

唐震傳云恭帝立起知饒州饒兵止千八百元軍略  
地震發民城守昧爽出治兵中夜不寐兵使來索歛  
狀通判萬道同偕寓士謀陰斂白金牛酒備降禮震  
叱去之民李希聖謀出降械寘於獄城中感其義共  
殺使者明年德祐改元二月兵大至都大提舉鄧益遁震  
出府庫金錢揭於市募人出戰衆懼無能應者北兵  
登陴遂潰震不屈與兄椿及家人俱死

密祐傳云大兵至隆興黃萬石移治撫州將遁懼祐

不從乃召祐援槃未至聞槃已降罵曰萬石賣國小  
人使我志不得伸已而元帥張榮實呂師夔提兵逼  
撫州祐率衆進至龍馬坪大兵圍之數重矢下如雨  
祐告其部下曰今日乃我死日若力戰或有生理衆  
咸奮自晨至昃面中矢拔之復戰身被四矢三槍麾  
下僅餘數十人祐揮雙刀斫圍南走馬渡橋斷被執  
終不屈而死時有淮人米立三世為將萬石署為殿  
前都統制迎戰於江被執不屈繫獄萬石既降再三

諭之不從遂遇害

汀寇紀畧云乙亥十二月江西諸郡受兵大勢震擾  
尉寨兇卒乘時畧邑賊首陳捷江七龍輩起中和保  
擁衆劫村落時南北未一有司招安之假以虛名使  
散其衆明年陳江降於制置使吳浚

二年

丙子元至  
元十三年

春正月甲戌元兵至瑞州知州姚巖棄

城走辛巳授留夢炎江湖兩地宣撫大使甲申遣御  
史楊應奎上傳國璽奉表稱臣削去帝號悉獻州郡

宋史紀事云正月進封吉王昱為益王判福州信王

昺為廣王判泉州五月益王即位於福州改元景炎

詔以趙潛為江西制置使進兵邵武謝枋得為江東

制置使進兵饒州

時枋得敗已不能軍

吳浚為江西招諭使鄒

淵副之毛統由海道至淮約兵會合六月吳浚聚兵

廣昌遂復南豐宜黃寧都三縣傅卓至衢信諸縣民

多應之者會浚兵敗卓詣元軍降七月文天祥開府

南劍州經略江西八月張世傑遣都統張文虎與吳

浚合兵十萬期必復建昌與李恒戰敗奔寧都九月  
元軍分道窺閩廣塏出及呂師夔李恒等以騎兵出  
江西十月天祥帥師次汀州遣趙時賞等將一軍趨  
贛以取寧都吳浚將一軍取雩都劉洙等皆自江西  
起兵來會元呂師夔將兵度梅嶺曾逢龍敗死十一  
月遣倪宙奉表請降於元

豫章書云正月知臨江軍滕巖瞻遁清江令孟濟死  
之二月瑞州安撫姚文龍及其帥張文顯降於元

隴吉撫城存隆興以汀州兵戍瑞金縣

浮梁兵燹志云正月元兵次饒州秋方登降范相棄城復走

端宗景炎二年

丁丑元至  
元十四年

春正月吳浚棄瑞金遁鎮撫

孔遵入之浚尋還汀州降三月天祥取興國縣夏五

月天祥自梅州提兵出江西入會昌縣六月辛酉天

祥取雩都己卯入興國縣秋七月遣兵取吉贛諸縣

圍贛州撫州人何時起兵來應江西宣慰李恒遣兵

援贛州而自將兵入興國八月天祥與諸將兵皆敗  
乃引兵即鄒淵於永豐淵兵亦潰天祥至空坑挺身  
走循州諸將皆被執九月元左丞達春將兵入大庾

嶺

同上

宋史紀事云二月吳浚既降元因至漳州說天祥降  
天祥責以大義斬之五月天祥復會昌縣六月天祥  
敗元軍於雩都七月使趙時賞等分道復吉贛諸縣  
遂圍贛州八月李恒遣兵援贛自將攻天祥於興國



天祥不意恒等猝至遣兵戰鍾步不利時鄒淵聚兵數萬於永豐引兵就之會淵兵先潰恒追天祥至方石嶺及之鞏信以短兵接戰恒駭其以寡敵衆疑有伏斂兵不進信坐巨石餘卒侍左右箭雨集屹不動恒從間道視之創被體而死不仆天祥至空坑兵盡潰趙時賞坐肩輿後元軍問為誰時賞曰我姓文衆以為天祥擒之由是天祥得與杜訥鄒淵乘騎逸去九月元將布哈等以步卒入大庾嶺合舟師追二王

撫州兵氛志云崇仁民羅辛二聚衆數百長驅入縣  
監邑忻都道殺羅尹焚縣治文廟去監邑孫廷玉導  
帥府兵屠之

帝昺元年

戊寅五月衛王改元  
祥興元至正十五年

冬十二月文天祥走海

豐張洪範執之元兵破南安守將李梓發死之

同上

江西通志卷三十

欽定四庫全書

史部

江西通志卷三十一

詳校官監察御史<sub>臣</sub>左周

檢討<sub>臣</sub>德生覆勘

總校官知縣<sub>臣</sub>楊懋珩

校對官中書<sub>臣</sub>高中

謄錄監生<sub>臣</sub>萬朝宗

欽定四庫全書

江西通志卷三十一

武事

三

元

世祖至元十六年

己卯二月宋主昺赴海死

春二月勅贛州造戰船

以征日本夏四月以江州隸黃蘄路宣慰司

豫章書

元史張弘略傳云十六年遷江西宣慰使會饒州盜

起犯都昌弘略以為饒雖屬江東

時屬江東建康道

與南康

止隔一湖此寇不滅則吾境必有相煽而起者乃使人直擣巢穴生縛賊酋磔於市餘黨潰散下令曰不操兵者皆為平民餘無所問

十七年

庚辰夏

四月南康杜可用叛命史弼討擒之秋七

月徙泉州行省於隆興

元史本紀

元史邱順傳云十七年陞鎮國上將軍都元帥鎮龍興諸路兼管本萬戶府事賜銀印吉顙盜起行省遷元帥府以鎮之

按二十一年始改隆興為龍興傳內字訛

十八年

辛巳

春二月以江西道宣慰使兼詔討使額特密

實叅知政事行中書省事閏八月江西行省薦舉兵

官命罷之

同上

十九年

壬午

春三月併江西福建行省冬十一月以袁州

饒州復隸隆興省十二月以中山薛保住上匿名書

告變殺宋丞相文天祥

同上

二十年

癸未

春正月令隆興行省遣軍護送占城糧船

時征

城占夏六月以征日本民間騷動盜賊竊發呼圖克特穆

爾蒙古岱乞益兵禦寇詔以江州軍付之同上

托羅該徹爾傳云二十年江西行省命討武寧叛賊  
董琦平之改授虎符江州萬戶府達魯噶齊

二十一年甲申春正月立江西行樞密院治撫州二月以

江西叛寇妻子賜鷹坊養虎者瑞州獲叛民晏順等  
三十二人并妻子送京師征占城船不足命江西省  
益之三月置贛吉撫建昌戍兵夏五月樞密院臣言

索多潰軍已令李恒收集江西潰軍別遣使招諭凡至者皆給糧舟楫損者修之以俟阿爾哈雅調用冬十一月江西行省叅政額特密實奏報獲海盜黎德及招降餘黨百三十三人即其地誅黎德以德弟黎浩及偽招討吳興等檻送京師

同上

二十二年乙酉春正月盧世榮請罷福建行中書省立宣慰司隸江西二月改江西招討司為上中下三萬戶府江西盜黎德等餘黨悉平秋九月以江淮行樞密



院所總蒙古兵戍江西

同上

地理志云二十二年江州復隸江西行省

續綱目云正月盧世榮奏罷江南行御史臺未幾帝  
以為疑安圖曰江南盜賊屢起行臺鎮遏之功居多  
不可罷但與行省並治杭州差覺僻遠宜徙江州據  
三省之間從之

二十三年

丙戌

春二月命江西行省兵伐交趾冬十月以

南康路

舊隸江  
淮行省

隸江西行省

同上

齊秉節傳云初授明威將軍二十三年移鎮饒州安仁劇賊蔡福一叛秉節與有司會兵討之擒福一餘黨悉平

二十四年

丁亥

春正月詔發江西蒙古漢兵征交趾冬十

月江西行院額特密實言廣東窮邊險遠江西福建諸寇出沒之所令江南諸省分軍一萬益臣詔江西呼圖克特穆爾以軍五千付之十一月以江西平章呼

圖克特穆爾捕廣東寇

豫章書

管如德傳云二十四年贛汀盜起如德指揮討平之  
脇從者多所全宥

二十五年

戊子

春三月廣東賊董賢舉等七人皆稱大老

聚衆反剽掠瑞撫龍興南安韶雄汀諸郡連歲擊之  
不能勝行樞密副使額特密實請益兵江西行省呼  
圖克特穆爾亦以地廣兵寡為言詔江淮省分兵詣江  
西秋七月以連歲盜起免南安瑞贛三路逋稅額特  
密實上言盜起廣東分江西江淮福建三省兵萬人

令臣將之討賊臣願萬人內得蒙古軍三百并臣所  
籍降戶萬人置萬戶府以蘇默格爾為達嚕噶齊佩  
虎符詔許之

同上

二十六年<sup>己丑</sup>春正月以左丞唐古岱副諳達呼圖克為  
蒙古都萬戶統兵會江淮福建二省及額特密實兵  
討盜於江西鍾明亮寇贛州掠寧都據秀嶺詔發江  
淮省及鄰郡戍兵五千遷江西省叅政管如德為左  
丞將兵往討夏五月明亮率衆來降江淮福建江西

三省所抽軍各還本翼秋七月誅信州叛賊鮑惠日等三十三人閏十月鍾明亮復反江羅等應之聲勢張甚詔額特密實復與福建江西省合兵討之且諭旨明亮既降朕令遣赴闕而汝玩常不發致有是變自今賊降其即遣之湖廣省臣言近招降贛州胡海等令將其衆屯田自給今過耕時不恤之恐生變命贛州路發米千八百九十石賑之

元史本紀

續綱目云夏四月福建叅知政事魏天祐執宗謝枋

得至燕不屈死之

陳邦瞻元史紀事云冬十月額特密實以邱應祥董賢舉歸京師鍾明亮復反

二十七年

庚寅

春二月江西諸郡盜未平詔江淮行省分

兵一千益之江西羣盜鍾明亮等復降詔徙為首者至京餘黨給糧江西賊華大老黃大老等掠樂昌諸郡行樞密院討平之三月建昌賊邱元等稱大老集衆千餘人掠南豐建昌副萬戶擒斬之以建昌路廣

昌縣經鍾明亮之亂免其田租九千四百四十七石  
夏五月江西行省管如德江西行院額特密實合兵  
討反寇鍾明亮明亮降詔縛致闕下如德等留不進  
明亮復率衆寇贛州樞密院以如德等違詔縱賊請  
詰之詔罷江西行樞密院移江西行省於吉州以便  
捕盜以烏拉岱為左丞江西行省言吉贛湖南廣東  
福建以禁弓矢賊益發乞依例許尉兵持弓矢從之  
六月別給江西行省印以便分省討賊從江西省請

發各省戍兵討賊秋八月以南安贛建昌豐州羅明

亮之亂悉免田租

同上

劉國傑傳云二十七年江西盜起龍泉下令往擊之  
諸將交諫曰此他省盜也國傑曰縱寇生患患將難  
圖豈可以彼此言耶乃選輕兵棄旗鼓去纓飾一日  
夜趨賊境賊衆數千逆戰望見軍容不整曰此鄉丁  
也易之國傑以數十騎陷陣衆從之賊大敗斬首五  
百餘級奪所掠男女日暮忽收兵去堡中民望見恠



之莫知其誰明日又忽至召堡民歸其男子曰吾劉  
二霸都也盜鍾太僚居南安十八磊國傑乘霧突入  
其巢賊衆驚亂自相蹂踐官軍搏之自旦至午擒殺  
甚衆還兵桂東二月龍泉盜復寇鄆縣國傑至賊退  
保大井山乘大雨盡掩殺之

劉壘平寇碑云至元戊子畬寇鍾明亮起臨汀有旨  
進討輒偽降以欺我師明年邱元起廣昌與明亮倚  
角遂及南豐勢張甚又明年春賊大至陣河田九陂

又陣小菜遂犯州州南門瞰江賊乘橋攻門城戍單  
弱乃斷橋以拒適雨暴江漲賊引退焚戮村落無虛  
日叅政李世安率諸將擣邱元之巢殲其渠邱元敗  
而明亮孤不數日賊悉平

二十八年

辛卯

春二月立江西行樞密院治汀州秋七月

治贛州

同上

二十九年

壬辰

春正月江西行省左丞高興言江西連年

盜起百姓入山以避乞降旨招諭復業

同上

三十年

癸巳

春二月江西行院額特密實請嚴庇匿盜賊

之禁

豫章書

三十一年

甲午正月  
世祖崩

冬十月罷江西行院并入行省

同上

巴延傳云江南三省累請罷行樞密院成宗問於巴  
延時已屬疾張目對曰內而省院各置為宜外而軍  
民分隸不便成宗是之三院遂罷

成宗元貞元年

乙未

夏五月竄蒙古部布古於江西俾從

額特密實討賊六月吉贛南安等處蠻寇竊發以軍

民官備禦不嚴撫字不至皆責而降之

元史本紀

二年

丙申

冬十月贛州盜起江西行省左丞董士選擊平

之

綱目續編

元史紀事云贛州民劉六十聚衆至萬餘建立名號  
朝廷遣將討之多觀望不進賊勢益盛左丞董士選  
請自往進至興國距其營百里命將校分兵守地悉  
置激亂之人於法復誅姦民為囊橐者於是民爭出  
自効不數日六十就擒餘黨悉散士選遣使奏聞但

請黜賊吏數人略不及破賊事時稱其不伐

元明善傳云董士選陞江西左丞辟明善為省掾會  
贛州賊劉貴反明善從士選將兵討之擒賊三百人  
明善議緩誅誤得全活者百三十人將佐白宜多戮  
以張軍聲明善固爭以為王者之師恭行天罰小醜  
陸梁戮其渠魁可爾民何辜焉既又得賊所書贛吉  
民丁十萬於籍請火之以滅跡二郡遂安

大德二年

戊戌秋七月吉贛立屯田

元史本紀

仁宗皇慶元年壬子春正月以吉州舊為分地改吉州路

為吉安路

豫章書

延祐二年戊辰秋七月贛州土賊蔡五九聚衆作亂敕遣兵捕之八月蔡五九陷汀州寧化縣僭稱王號詔遣江浙行省平章張驢等率兵討之臺臣言蔡五九之變皆由昵匪馬丁經理田糧與郡縣橫加酷暴逼抑至此新豐一縣撤民廬千九百區夸墓揚骨虛張頃畝流毒居民乞罷經理及冒括田租制曰可九月蔡

五九衆潰伏誅餘黨悉平敕賞軍士討捕功并官死

事者子孫

元史本紀

贛州志云乙卯四月寧都賊蔡五九聚衆兔子寮五王廟張漢高旗幟殺趙同知圍州城燒四關勢甚猖獗奏遣張驢會江浙兵討之五王廟者邑妖祠也像設極魔恠人莫敢側目土人類縛生口以祭我軍見之畏縮押錄王榮叔獨奮義火之三大三滅乃取婦人褰衣褰神首一火而燼遂平其城石城弓兵宋伏

成於木麻坑擒五九伏誅

五年

戊午

秋七月流諸王伊實於江西

以諸王布琳尼敦之叛不助官軍進

討也

冬十月贛州路雩都縣里胥劉景周以有司徵括

田新租聚衆作亂救免徵新租招諭之

同上

六年己春正月廣東南恩新州徭賊龍郎庚等為寇命

江西行省發兵捕之

同上

泰定帝泰定二年

乙丑

秋七月海北徭酋盤吉祥寇陽春

縣命江西行省督兵捕之九月分天下為十八道遣



江東廉訪使圖烈圖太史院使齊履謙之江西宣撫

同上

文宗天歷二年己巳春三月調江西兵討四川囊嘉特

豫章

書

至順元年

庚午

夏四月詔江西調兵會討雲南祿余

宣撫使

秋七月詔江西建昌萬戶府軍戍廣海者一歲更役

來往勞苦仍至元舊制二歲一更九月江西軍征雲

南者人給鈔五錠

元史帝紀

二年

辛未夏

五月置臨江宣慰司兼管軍萬戶秋七月海

南黎賊作亂詔江西湖廣兩省合兵捕之

同上

順帝元統二年

甲戌

秋九月猺賊陷賀州發江西軍從廣

西宣慰使帥章巴延擊之

同上

至正三年

丁丑

春正月廣州增城朱光卿反其黨石崑山

鍾大明率衆從之偽稱大金國改元亦符命指揮扎

哈爾及江西行省左丞實迪討之二月廣西猺賊復

反命江西行省平章圖嚕默色哈雅總兵捕之夏四

月惠州歸善聶秀卿譚景山等造軍器拜戴甲為定  
光佛與朱光卿相結為亂命左丞實迪收捕秋七月  
哈扎爾實迪擒朱光卿尋追擒石崑山鍾大明九月

立江西行樞密院

同上

四年

戊寅

春二月罷行樞密院夏六月素州民周子旺反

僭稱周王偽改年號尋擒獲伏誅漳州路李志甫反  
守將綽斯戡與戰失利詔江浙行省平章拜布哈總  
江西閩廣軍討之

同上

至正五年乙酉冬十月命前雲南行省右丞薩克繖將作院

使王士宏巡江西一切興利除害之事悉聽舉行豫章

書

六年

丙戌

秋八月命江西行省右丞圖魯合江浙軍討汀

賊羅天麟閏十月賊徒羅德用殺羅天麟陳積萬以

首級送官餘黨悉平

元史本紀

七年

丁亥

冬十一月徭賊吳天保陷靖州命威順王庫春

布哈鎮南王博囉布哈及江西湖廣二省以兵討之

同上

八年

戊子

萬載妖人彭國玉以白蓮惑衆倡言撒豆成兵

飛茅為劍謀不執事敗竄入麻城合鄒普勝之衆數

萬以紅巾為號

素州遺事志

十一年

辛卯

冬十一月江西妖人鄧南二作亂攻瑞州總

管禹蘇福擒斬之

元史本紀

大志云蘄黃紅巾蔓延新建土寇鄧南二由蘄黃鶴

鄉乘勢聚衆往攻瑞州守禦官軍出城迎捕行省遣

萬戶張當作妥因領兵次烏山夾攻擒獲鄧南二誅

之

十二年

壬辰

春二月徐壽輝

蘄州人僭號天完

兵陷江州總管李

黼死之遂陷南康路壽輝偽將歐祥陷索州春三月

偽將陶九陷瑞州總管禹蘓福萬戶張岳敗之偽將

項普略陷饒州路遂陷信州以江浙行省左丞額琳

沔勒為江西行省左丞領兵收捕饒信賊閏三月壽

輝偽將陳普文陷吉安路鄉民羅明遠起義兵復之

以大都留守諤格實為江浙行省添設右丞討饒信賊命左丞和尼齊以兵守江東西關隘右丞額琳沁巴勒與叅知政事托迪討江西賊夏四月臨川賊鄧忠陷建昌路江西宜黃賊塗佑與邵武建寧賊應必達等攻陷邵武路總管吳阿勒坦布哈以兵討之千戶魏淳計擒塗佑應必達五月建昌民戴良起鄉兵克復建昌路冬十一月以桑節為江西行省平章出師湖廣十二月以信州克復赦誣誤者蠲其夏稅秋糧

同上

元史紀事云二月徐壽輝兵攻九江右丞博囉特穆爾方駐兵於江間風宵遁總管李黼檄鄉落聚木石于險處遏其歸路黃梅主簿伊遜特穆爾願擊賊黼與出戰殺獲二萬餘人黼曰賊不利於陸必以舟薄我今以長木數千冒鐵錐于杪暗植沿岸水中賊舟數千艘順流鼓譟而至遇木樁不得動發火箭射之焚溺無算時東際淮甸西迄荆湖守臣往往棄城遁黼中外援絕賊進兵薄城分省平章圖沁布哈自北



門出走黼引兵登陴賊已焚西門張努射之轉攻東  
門黼急往救城已破猶與巷戰力不能敵乃揮劍叱  
之曰殺我無殺百姓賊刺之墮馬與兄冕子秉昭俱  
死事聞贈黼隴西公諡文忠三月賊陷饒州執魏中  
立陷信州執于大本二人不屈並死之十二月江西  
行省平章桑節馳赴任比至江東復有詔令守江州  
時江州已陷桑節募兵得三千人擒周驢奪船六百  
艘軍聲大振進復湖口縣克江州留兵守之命王惟

恭柵小孤山桑節據番陽口綴江西要衝以圖恢復  
日久援不至賊乘大艦來攻編葦筏塞上下流火之  
桑節率兵力戰衆死且盡桑節猶堅坐不動中流矢  
而仆賊素聞其名不忍害昇至密室乃蘓羅拜餽食  
桑節叱之七日乃自力而起北向再拜曰臣力竭矣  
遂絕

道通傳云塔奇勒布哈由江州遁還布延布哈將兵  
往江州至石頭渡遇賊戰敗道通聞之大恐即懷省

印遁走布延布哈還與章巴延定守城之計後數日  
道童始自南昌民家來歸遂議分門各守以備敵數  
月賊衆來圍城城中置各廂官及各巷長晝夕堅守  
道通素恤民能任人有功者必賞無功或不加罪故  
多為之用賊圍城凡兩月民無離志道通密召死士  
數千面塗以青額抹黃布衣黃衣為前鋒又別選精  
銳數千為中軍而募助戰者殿後命萬戶章托音博  
囉哈達領之夜半開門伏兵柵下黎明鉦鼓大震因

奮擊賊驚為神敗走遂乘勝擣其營復分兵埽其餘  
黨巴延功最多尋以病卒

額琳沁巴勒傳云十二年移江西行省左丞相妖寇由  
蘄黃陷饒州饒之屬邑安仁與龍興接境其民皆為  
亂額琳沁巴勒道出安仁因駐兵招之來者厚加賞賚  
不從者命子哈喇多爾濟與右丞和尼齊乘高縱火  
攻散之餘干久為盜區亦聞風順服

大志云十二年春蘄黃有稱鄒元帥者

即鄒普勝

由湖廣

九江率衆水路來攻龍興圍城五十四日時平章道  
通署左丞章巴延郎中布延布哈廉訪僉事蘇勒坦  
并力固守官軍雖單弱幸民之敢勇者赴義死戰老  
弱亦登城運石行饁遙臨江楊萬戶率義兵來援省  
臣命駐撫州門與城中接勢翼日楊以小舟自城南  
順流而下城中義兵亦自新城門小渠中出龍沙汜  
流而上合戰無虛日屢獲其巨艦輜重賊不能支夕  
遁去三月紅巾蕭鄭二百戶與新塘塘主羅志名者

立寨閏三月廿一日義士夏正卿譚則賢等率義兵  
五千人擊之戰敗殺溺千餘人正卿死之蕭鄭亦遁  
去又史普清者稱元帥率蘄黃之衆數百自奉新抵  
新建驅脇鄉民據新塘復立寨土寇喻譙可屈祥喻  
昇余玉等佐之故家大族殘滅殆盡鄒旣敗走行省  
屢遣朱千戶領兵討之不能克義士夏益卿熊天佐  
等不敢入惟駐生米章家渡以為郡城西障時阿都  
齊招集義兵屯大塘嶺遏興國建昌往來之衝以故

西岸之紅巾不得近城至秋鄒復遣其黨自興國出武寧奉新豐城入南昌境欲攻城義士黃季中劉仲昇等率義兵接戰勝之維時藩府雖鞏固而四郊皆寇壘也

豫章書云至正壬辰紅巾賊再陷新昌義士張子忠罵賊而死里人毛忠吾保逍遙山招郭克敬合兵援州治復之撫州志云閏三月紅巾自臨江富州

今豐城

入撫州監郡諤勒哲特穆爾元帥章士謙戰屢捷寇不

能入

十三年

癸巳

夏五月江西左丞額琳沁巴勒江浙左丞羅羅

取道自信州元帥韓邦彥哈爾取道由徽州浮梁同

復饒州蘄黃賊聞風皆奔潰秋八月資政院使托果

齊復江州冬十一月江西右丞和尼齊以兵平富州

臨江遂復瑞州是月立義兵千戶水軍千戶所於江

西事平願為民者聽

同上

瑞州志云右丞和尼齊進兵復瑞擒況普天閔總管



彭國玉併家屬無少長鬻之民應之者亦戮以徇

餘干災祥志云五月知州烏樞復州治七月吳宏復

陷餘干

十五年<sub>乙未</sub>春二月命刑部尚書董銓與江西行省平章

和尼齊專征討冬十一月賊陷饒州路

<sub>豫章書</sub>

吉安郡紀云十五年亥寇李明陷安福

十六年

<sub>丙申</sub>

江西廉訪使吳當調檢校章迪率本部兵與

兵部尚書黃昭夾攻撫州勦殺首寇胡志學進兵復

崇仁宜黃於是建撫兩郡悉定

元史本傳

十八年

戊戌

夏四月陳友諒

沔陽人本姓謝

陷龍興路省臣道通

和尼齊棄城遁友諒遣王奉國陷瑞州路五月庚戌

友諒陷吉安路辛酉陷撫州路秋八月友諒兵陷建

昌路九月友諒陷贛州路江西行省叅知政事沁布

阿咱爾及總管噶海齊死之

元史本紀

道通傳云四月友諒復攻江西城時和尼齊已陞平章政事加營國公行便宜事任專兵柄素與道通不

相能且貪忍不得將士心見城且陷夜遁道通亦棄  
城退保撫州路追者至道通欲迎敵渡水未登岸賊  
衆乘之遂為所害

沁布阿咱爾傳云江西下流諸郡皆為友諒所據乃  
與總管噶海齊戮力同心友諒遣將幸文才率兵圍  
賴使人脅之降沁布阿咱爾斬之擐甲拒戰凡四月兵  
少食盡義兵萬戶瑪哈瑪迪沙欲舉城降遂自剄事聞  
贈諡曰愷哀噶海齊亦不降見殺

郭鈺悲廬陵詩序云袁兵逼城屯藤橋丁酉正月廬陵陳瓘出屯城北之青湖二月吳都事命兵校明某下桐江計事不報入蘭溪召不至五月桐江李彬誅六月袁州兵退秋明某歸以其屬屯太和之永和十一月明某矯殺騎將林巴延武端不問戊戌正月元叅政兵亂逐鎮撫吳林三月梁太守卒安成兵自去冬侵掠北境四月復至桐江五月初四退初十戊申分宜袁雲飛導沔兵至桐江己酉義士劉照與戰於

吉水之灘頭庚戌明某以都事之衆降辛亥傳于城  
錄事張元祚與攝監郡雅某降元叅政奔贛叅謀鄉  
貢進士吉水蕭彞翁死之陳瓘召安成兵入城六月  
吳都事將其屬居吉水之蘆兜此吉安再陷之略也  
大志云陳友諒黨熊天瑞陷贛州遣指揮王璵據南  
安

十九年

己亥夏

六月天完將陳友諒攻信州元江東廩訪

使巴延布哈德濟往救死之冬十二月天完將陳友

諒從其主徐壽輝都江州自稱漢王

綱目續編

巴延布哈德濟傳云正月自衢引兵來援遇王奉國  
城東力戰破走之時鎮南王子大聖努屯兵城中開  
門出迎巴延布哈德濟登城四顧誓以破賊自許後  
賊復來攻乃命大都律將阿蘓諸軍及民義為左翼  
出南門高義范則忠將信陽一軍為右翼出北門自  
與呼圖克布哈將沿海諸軍為中軍出西門因奮擊入  
賊營斬首數千級幾擒奉國適賊將突至其勢幾殆

呼圖克布哈勒兵力戰大破之二月友諒弟友德于城東繞城植木柵攻益急又遣偽萬戶周伯嘉來說降高義潛與之通給呼圖克布哈率則忠等十人往見奉國皆囚之明日令高義單騎來誘巴延布哈德濟曰我頭可斷足不可移乃數其罪斬之由是日夜與賊鏖戰糧竭矢盡氣不少衰軍民惟食草苗茶紙括靴底掘鼠羅雀及殺老弱以食五月大破賊兵六月奉國親來攻城晝夜不息者踰旬賊穴地百餘所或魚

貫梯城而上麾兵拒之已而士卒力疲不能戰萬戶

顧瑪爾以城叛遂陷大聖努赫魯

參謀

皆死之巴延布

哈德濟力戰不勝遂自剄其部將蔡誠蔣廣巷戰誠  
遇害廣為奉國所執罵賊磔于竿義兵陳受痛罵不  
屈賊焚殺之

撫州志云六月新淦寇鄧克明擒殺劉世英據崇仁  
樂安安仁人王溥據金谿友諒以克明為右丞據撫

州



元史紀事云初壽輝聞友諒破龍興欲徙都之友諒忌其來不利於已不從至是壽輝引兵南下江州友諒陽出迎伏兵城西既入門閉伏發盡殺其部曲惟存壽輝以江州為都居之遂自稱漢王立王府置官

屬事權盡歸友諒壽輝惟擁虛位而已

明年五月弒壽輝自稱漢

帝改元大義

二十年

庚子

夏六月明兵取信州路

元史本紀

谷應泰明史紀事云六月胡大海率兵至靈溪城中

步騎數千出迎戰擊敗之督兵攻城衆潰遂克之改  
信州為廣信府以大海子德濟為同僉守之七月餘  
壽輝舊將浮梁院判于光左丞余椿擊走偽漢將辛  
同知取饒州以城來降命鄧愈往鎮之饒濱鄱陽湖  
友諒數遣舟師來攻愈與光連營拒之已而漢將侯  
邦佐陷浮梁于光單騎來歸九月壽輝舊將歐普祥  
以索州來降友諒遣其弟友仁攻普祥擊敗之擒友  
仁友諒懼乃與普祥約和釋友仁歸

南安事考云二十年龍泉寇彭時中偽號東周據上

猶大志云時中遣其黨段九據上猶尋為偽漢所戮

二十一年

辛丑

秋八月明兵取江州路時偽漢陳友諒據

江州為都至是退都武昌九月取建昌饒州二路

同上

明史紀事云三月友諒遣其將李明道寇廣信據草

坪

一作草平鎮

遏浙東援兵胡德濟遣夏德潤出兵奪其

墩戰死賊又保玉山胡大海部將繆義聞之來援與

賊戰於東津橋遂復玉山抵廣信絕明道歸路明道

圍廣信急德濟兵少嬰城守遣使求援于父大海大海率師由靈溪進李文忠亦遣兵援之德濟聞援兵至引兵出城與大海夾擊明道擒之及其宣慰王漢二大海送明道漢二於文忠建昌守將王溥漢二兄也遂歸附俱送建康太祖釋而用之征江州南昌用為鄉導八月劉基請棄安慶去徑拔江州傾其巢穴從之遂率兵西上長驅過小孤友諒將丁普郎傅友德率所部歸附次湖口友諒舟出江偵邏擊敗之乘

勝至江州友諒以為神兵自天而下倉卒不能軍挈妻子夜奔武昌師入江州偽漢江西行省丞相胡廷

瑞

後改名廷美

守南昌遣其部將鄭仁傑納款且請禁止

數事勿散離其所部兵太祖有難色劉基自後踢所坐胡牀太祖悟許之賜書慰諭廷瑞得書遣康泰詣九江降漢將餘干吳宏龍泉彭時中吉安曾萬中孫本立皆遣使納款命趙德勝廖永忠等分兵攻瑞州臨江諸郡鄧愈帥兵襲浮梁侯邦佐棄城遁于光進

拔樂平敗偽蕭總管擒萬戶彭壽等六十八人饒州  
悉定十月愈駐兵臨川之平塘時友諒將鄧克明據  
撫州佯遣使通款無降意愈知其情捲甲夜趨比旦  
入城克明單騎遁尋被獲

大志云十一月康茂才蔡遷等敗偽漢八陣指揮遂  
取瑞昌縣

豫章書云八月甲申師克浮梁樂平先是元帥王思  
義克鄱陽之利陽鎮擒賊首楊文友戮之遂會僉院

鄧愈兵於三洞源議取浮梁旣而愈兵攻浮梁不下  
命理問谷繼先院判劉文旺率兵往助之至是克浮  
梁友諒守將侯邦佐等棄城走院判于光復攻樂平  
友諒總管蕭明率將拒戰光擊敗之擒其萬戶彭壽  
等遂克之甲辰克南康以星子縣令陳子亨守之九  
月辛卯偽漢平章吳宏王溥以饒建降甲寅克德興  
壬戌王溥遣檢校劉巨川以南豐臨川金谿降十一  
月偽漢右丞鄧克明遣其員外羅天錫以分省印及

撫州建昌臨江汀州四路南豐寧都富州三州樂安  
臨川等十八縣印詣鄧愈降愈留克明于軍中令其  
弟志明還新淦收其部曲克明請往九江謁見愈以  
兵送之中途逃歸新淦明年於龍興城下被執

二十二年

壬寅

春正月明兵取江西龍興諸路

同上

明史紀事云正月太祖幸南昌胡廷瑞率祝宗康泰  
等迎謁以鄧愈為江西行省叅知政事鎮南昌時宗  
泰降非本意即欲謀叛廷瑞密以言乃令帥所部從



徐達攻武昌二月太祖率胡廷瑞等還建康祝宗康泰行至女兒港遂叛道掠布商船為旗反兵劫南昌知府葉琛迎戰死之鄧愈倉卒以數十騎出走數與賊遇愈窘甚連跳跨三馬馬輒踣幾不免最後得養子所乘馬走還建康徐達聞變旋師赴之宗至新淦為鄧志明所殺泰走廣信以廷瑞甥特宥之南昌復定太祖聞之喜曰南昌控引荆越西南之藩屏得南昌去陳氏一臂矣非骨月重臣不可守五月命大都

督朱文正統元帥趙德勝薛顯同叅政鄧愈鎮之八  
陣指揮聚衆結黨寨南昌之西山趙德勝孫興祖攻  
破之俘斬三千餘人十二月漢將熊天瑞寇吉安陷  
之殺守將孫本立友諒使其知院饒弼臣守吉安弼  
臣剽悍有膽略所至毒害人呼為饒大膽文正遣兵  
復吉安弼臣出走

豫章書云正月寧州土豪陳龍以分寧奉新通城靖

安德安武寧

元志寧州領分  
寧武寧二縣

六縣降

二十三年

癸卯

秋八月明兵與偽漢兵大戰於鄱陽湖陳

友諒敗績而死

同上

明史紀事云二月偽漢太尉張定邊陷饒州于光走  
還四月陳友諒忽其疆場日盛大作舟艦高數丈飾  
以丹漆上下三級級置走馬棚下設板房為蔽置艣  
數十其中上下人語不相聞艣箱皆裹以鐵自謂必  
勝載其家屬百官空國而來兵號六十萬攻南昌壬  
戌薄城下諸將分門拒守鄧愈守撫州門趙德勝守

宮步士步橋步三門薛顯守章江新城二門牛海龍  
等守琉璃澹臺門文正居中節制自將精銳二千往  
來策應丙寅友諒親督兵攻撫州門兵各戴竹盾如  
箕狀以禦矢石城壞二十餘丈鄧愈以火銃擊退其  
兵隨豎木柵賊爭柵文正督諸將死戰且戰且築通  
夕復完李繼先牛海龍趙國旺許珪朱潛等皆戰死  
五月丙子友諒復攻新城門薛顯將銳卒開門突戰  
斬其平章劉震昭敵兵退百戶徐明被執死之六月

辛亥友諒增脩攻具欲破柵自水闕入文正使壯士以長槊從柵內刺之敵奪槊更進文正乃命煅鐵戟鐵鉤穿柵復刺敵來奪手皆灼爛不得進友諒盡攻擊之街城中備禦萬方殺傷甚衆友諒分遣饒昺臣等陷吉安李明道叛守將曾萬中死之劉齊朱叔華被執陷臨江復執趙天麟以三人徇城下文正等不為動賊復攻宮步士步二門趙德勝巡城至宮步門賊伏蹶張弩射之中腰脅箭深入六寸拔出遂卒南

昌被圍既久內外阻絕文正遣千戶張子明赴建康告急又詐遣卒號捨命王者詣友諒約日出降友諒信之緩其攻至日城上旗幟一新友諒候至暮見無降意縛降卒至城下殺之張子明取漁舟從水關出越石頭城晝行夜止半月達建康太祖問友諒兵勢何如對曰友諒兵雖盛戰死亦不少今江水日涸巨艦將不利又師久糧乏援兵至必可破也太祖曰歸語文正但堅守一月吾當自取之乃遣子明先還至

湖口為友諒兵所執友諒曰若能誘降非不死且富貴子明陽許之至城下呼曰主上令諸公堅守大軍且至矣友諒怒殺之文正等聞之守益堅七月癸酉太祖自將救洪都徐達常遇春亦自廬州還太祖親督諸將會師禡纛於龍江舟師凡二十萬癸未進次湖口先遣指揮戴德以一軍屯於涇江口復以一軍屯南湖嘴以遏友諒歸師又遣人調信州兵守武陽渡防其奔逸丙戌友諒圍南昌凡八十有五日聞

太祖至解園東出鄱陽逆戰太祖率諸將由松門入  
鄱陽湖丁亥遇於康郎山友諒列巨舟當我師太祖  
見之謂諸將曰彼巨舟首尾連接不利進退可破也  
乃命舟師為二十隊火器弓弩以次相佐而列戒諸  
將近寇舟先發火器次弓弩及其舟則短兵擊之戊  
子徐達常遇春廖永忠等進兵搏戰達身先諸將擊  
敗其前鋒殺千五百人獲一巨舟而還軍聲大振俞  
通海復乘風發火礮焚寇舟二十餘艘殺溺死者甚



衆徐達等搏戰不已火延及達舟敵乘之達撲火更戰太祖亟遣舟援達友諒驍將張定邊奮前犯太祖舟舟膠於沙漢兵匝焉程國勝劍叱之與陳兆先大奮擊牙將韓成進曰古人殺身以成仁臣不敢愛其死乃服上冠袍對敵自投水中敵信之攻少緩宋貴陳兆先俱戰死常遇春從傍射中定邊定邊舟始却俞通海來援舟驟進水湧太祖舟遂脫通海與廖永忠以飛舸追定邊定邊走身被百餘矢退去會日暮

太祖鳴鉦集諸將申約束恐張士誠乘虛入寇命徐達回守建康己丑太祖復親布陣與友諒戰友諒悉巨舟連鎖為陣旌旗樓櫓望之如山我舟小仰攻多却太祖親麾之不前右師少却立命斬隊長十餘人猶不止郭興進曰非人不用命舟大小不敵也臣以為非火攻不可太祖然之命常遇春等分調漁舟載荻葦置火藥其中至晡時東北風起命以七舟束草為人飾以甲冑持兵戟若鬪敵狀令敢死士操之備

走舸於後將迫敵舟乘風縱火風急火烈須臾抵敵  
舟焚水寨數百艘燔燄漲天湖水盡赤死者大半友  
諒弟友仁友貴及其平章陳普略等皆焚死我師乘  
之又斬二千餘級友仁者即所謂五王也眇一目有  
智數梟勇善戰至是友諒為之喪氣普略即新開陳  
也是日張志雄舟檣折為敵所覺以數舟攢兵鉤刺  
之志雄窘迫自剄丁普郎余昶陳弼徐公輔皆戰死  
普郎身被十餘創首脫猶植立舟中不仆持兵若戰

狀時太祖所乘舟檣白友諒覺欲併力來攻庚寅夜  
令諸船盡白其檣旦莫能辨敵益駭辛卯復率衆大  
戰自辰至已不解時劉基侍忽躍起大呼太祖亦驚  
起回顧但見基雙手揮之曰難星過急更舟太祖如  
言入他舟坐未定舊所御舟以礮碎矣友諒乘高見  
舟碎喜甚俄太祖麾舟更進皆失色廖永忠俞通海  
汪興祖趙庸以六舟深入敵聯大艦拒戰蔽之舟若  
沒有頃六舟旋繞漢軍而出勢如游龍諸將見之勇

氣百倍呼聲動天地波濤起立日為之晦時漢舟大  
我師環攻之殺其卒殆盡而操舟者猶不知呼號搖  
櫓如故已而焚其舟皆死至午敵兵大敗棄旗鼓器  
仗浮蔽湖面通海等還太祖勞之曰今日之捷諸君  
之力也友諒戰不利欲退保鞋山我師先至罌子口  
橫截湖面邀友諒不得出乃歛舟自守不敢更戰是  
日移舟泊柴棚去敵五里許諸將欲退師少休士卒  
太祖曰兩軍相持先退非計也俞通海以湖水淺請

移舟扼江上流劉基亦密言當移軍湖口期金木相  
犯日決勝太祖從之時水路狹隘舟不得並進恐為  
敵所乘至夜令船置一燈相隨渡淺比明已盡渡乃  
泊於左蠡友諒亦移舟出泊潯磯相持者三日初友  
諒戰不利右金吾曰今戰不勝出湖寔難莫若焚舟  
登陸直趨湖南謀為再舉左金吾曰今雖不利我師  
猶多勦力一戰勝負未可知何至自焚以示弱萬一  
舍舟登陸彼以步騎躡我後進不及前退無所據矣

友諒猶豫不能決至是失亡多乃曰右金吾言是也  
左金吾聞之懼來降右金吾亦率所部來歸友諒兵  
益衰太祖既駐師彭蠡移書謂之友諒得書怒留使  
者不遣盡殺所獲戰士太祖聞之命悉出所俘友諒  
軍視其傷者賜藥療之皆遣還下令曰但獲彼軍皆  
勿殺又令祭其弟姪及將士戰死者師出湖口命遇  
春永忠諸將統舟師橫截之又令一軍立柵於岸控  
湖口旬有五日友諒不敢出復移書與之友諒忿恚

不答太祖與博士夏煜等日草檄賦詩意氣彌壯友  
諒食盡掠糧於南昌朱文正遣人燔其舟勢益困時  
我師水陸結營列柵江南北岸置火舟火筏中流戒  
嚴以俟八月壬戌友諒計窮冒死突出繞江下流欲  
由禁江遁回太祖麾諸軍追擊以火舟火筏衝之敵  
舟散走追奔數十里自辰至酉戰不解至涇江口涇  
江之兵復擊之張鐵冠大笑賀曰友諒死矣未幾有  
降卒來奔言友諒在別舸中流矢貫睛及顱而死諸



軍聞之大呼喜躍益爭奮擒其太子善兒明日平章  
陳榮等悉舟師來降得士卒五萬餘人張定邊乘夜  
以小舟載友諒屍及其子理奔還武昌復立理為帝  
改元德壽

遊宦餘談云定住為偽漢守臨江兵不滿千人屢挫  
強敵鄱湖之戰住以元戎領兵江上我師殲焉惜其  
不能擇主而身名俱隕也

二十四年

甲辰

春正月太祖建國號曰吳二月自將伐漢

漢主陳理降湖廣江西悉平

綱目續編

明史紀事云二月陳理降四月命建忠臣祠於鄱陽

湖康郎山祀韓成丁普郎等三十六人建忠臣祠於

南昌府

癸卯冬改洪都府為南昌府

祀趙德勝李繼先等十四人

時熊天瑞尚據贛州八月命常遇春鄧愈率兵討之

愈與遇春合兵平臨江之沙坑麻嶺牛陂諸寨執偽

知州鄧志明送建康及其兄克明俱伏誅時李明道

匿武寧山被獲以其反覆亦戮之遇春兵次吉安遣

人語饒昺臣曰吾今往取贛可出城一言而去昺臣  
怖不敢出遣其幼子出見遇春坐而飲之曰歸語而  
父可善自為計昺臣夜棄城走安福遇春復吉安引  
兵趨贛州已而昺臣復肆剽掠王國寶擊斬之九月  
常遇春等圍贛州未下太祖諭之曰熊天瑞困處孤  
城猶籠禽阱獸豈能逃逸但恐城破之日殺傷過多  
要當以保全生民為心一則可為國家二則可為未  
附者勸時天瑞拒守益堅遇春乃浚濠立柵以圍之

明書載熊天瑞事云熊元震本姓田氏善戰有名天瑞養以為子常遇春之圍贛也元震竊出覘兵勢遇春亦引數騎出猝與相遇元震不知為遇春過之及遇春還始覺遂單騎前襲遇春遣從騎揮刀擊之元震奮鐵槌且戰且走遇春曰壯男子也喜其才勇後從天瑞降薦為指揮使又贛志云永新人尹堅從熊天瑞據贛為兵馬指揮登城飛鉅石傷常遇春頰明日天瑞降堅將自殺遇春召慰曰好男子當如是留

置幕下還朝言於上命武士與角力皆不支以為直  
殿將軍

鄧愈傳云太祖已平武昌使愈率兵徇江西未附州  
縣鄧克明之弟志清據永豐有卒二萬愈擊破之擒  
其大帥五十餘人其徇安福也部卒有鹵掠者判官  
潘樞入謁面責之愈立驚謝趣下令掠民者斬索軍  
中所得子女盡出之

湯和傳云討平江西諸山寨永新守將周安叛進擊

敗之連破其十七寨圍城三月克之執安以獻

二十五年己春正月偽漢守將熊天瑞以贛州降於明  
元史

明史紀事云正月天瑞被圍日久力不能支乃降其  
所統南安雄州韶州諸郡皆下太祖聞遇春克贛不  
殺喜甚遣使褒諭先是天瑞橫歛取民財悉命罷之  
遇春進師南安招降未下諸郡振旅而還

陸仲亨傳云從常遇春討贛州天瑞降為贛州衛指

揮使節制嶺南北新附諸郡調兵克會昌悉平諸山寨

黃彬傳云歐普祥死彬領其衆從常遇春征贛州饒  
鼎臣據吉安為熊天瑞聲援遇春至鼎臣走安福彬  
以兵躡之走茶陵天瑞乃降從湯和執周安後移鎮  
袁州招集諸山寨江西悉定

大志云都督朱文正遣叅政何文輝指揮薛顯討新  
淦鄧仲瀛

明書薛顯  
傳作仲瀛

斬之摧薛顯為江西行省叅政

餘干災祥志云吳乙巳年寇蕭明雷應霖襲餘干知

州侯斌遇害

二十七年

丁未明太祖吳元年

冬十月太祖命胡廷瑞率吉安等

軍南取八閩

綱目續編

何深傳云深獲陳友定守將張子玉因請發廣信撫

州建昌三路兵規取八閩太祖喜曰子玉驍將擒之

則友定破膽乘勢攻之必克乃命廣信指揮朱亮祖

由鉛山建昌左丞王溥由杉關會深齊進

明年二月湯和等執



陳友定械  
送京師



江西通志卷三十一